

## Ketokohan dan Pemikiran Dakwah Tuan Haji Yusof Rawa (1922 – 2000) di Malaysia

**Badlihisham Mohd Nasir<sup>1</sup>**

Akademi Tamadun Islam Fakulti Sains Sosial & Kemanusiaan Universiti Teknologi  
Malaysia

Email: badlihisham@utm.my

**Abdur Razzaq<sup>2</sup>**

Fakultas Dakwah dan Komunikasi UIN Raden Fatah Palembang

Email: abdurrazzaq\_uin@radenfatah.ac.id

**Abstrak:** Artikel dengan judul ‘Ketokohan dan Pemikiran Dakwah Tuan Haji Yusof Rawa (1922 – 2000) di Malaysia’, ini bertujuan memaparkan dan menganalisis ketokohan dan pemikiran al-marhum Tuan Haji Yusof Rawa dalam bidang dakwah Islamiah. Dimulai dengan menyorot latar belakang ketokohan beliau dan seterusnya membincangkan mengenai pemikiran dakwah Islamiahnya. Metode yang digunakan dalam kajian ini menggunakan metode atau pendekatan kepustakaan (*library research*). Studi pustaka dapat diartikan sebagai serangkaian kegiatan yang berkenaan dengan metode pengumpulan data pustaka, membaca dan mencatat serta mengolah bahan penelitian. Temuan dari penelitian ini menunjukkan peranan tokoh ini dalam mengendalikan zaman transisi orde lama kepada orde baru telah sejalan dengan tuntutan zaman. Beliau berhasil menjadi seorang bapak bagi partai dan menegakkan asas fundamental yang menjadi dasar dan kompas kepada perjalanan partai selanjutnya. Walaupun beliau mencetuskan berbagai ide dan pemikiran yang melambangkan keterbukaan PAS kepada perubahan zaman, beliau sangat arif menggariskan idealisme partai hingga kekal utuh sampai sekarang. Ketokohnanya dalam mencetuskan pemikiran dakwah yang lebih mirip kepada *PAS-centric* serta diselubungi dengan kontroversi pada waktu itu, telah mendahului banyak pihak dalam memperkenalkan gagasan besar seperti *tajdid hadhari* yang kemudian diakui menjadi sumber inspirasi kepada gagasan Islam *hадhari* yang dilancarkan oleh pemerintahan UMNO pimpinan Tun Abdullah Ahmad Badawi.

**Kata kunci:** Pemikiran dakwah, Haji Yuso Rawa

**Abstract:** Article with the title '*Characteristics and Thought of Mr. Haji Yusof Rawa's Da'wah (1922 - 2000) in Malaysia*', this aims to describe and analyze the character and thoughts of al-marhum Mr. Haji Yusof Rawa in the field of Islamic da'wah. It starts by highlighting his background in figures and goes on to talk about his Islamic da'wah thoughts. The method used in this study uses a library research method or approach. Literature study can be interpreted as a series of activities relating to the method of collecting library data, reading and recording and processing research material. The findings of this study indicate the role of this figure in controlling the age of the old order transition to the new order has been in line with the demands of the era. He succeeded in becoming a father to the party and upholding the fundamental principles that became the basis and compass for the next party journey. Although he sparked ideas and thoughts that symbolized the openness of PAS to the changing times, he was very wise in outlining the idealism of the party to the point of eternity until now. His strong stance in sparking Da'wah thoughts that were more similar to *PAS-centric* and shrouded in controversy at the time, had preceded many

parties in introducing great ideas such as the Hadith tajdid which later was recognized as a source of inspiration for the hadhari Islamic ideas launched by the UMNO government led by Tun Abdullah Ahmad Badawi

**Keywords:** Da'wah thought, Haji Yusof Rawa

## Pendahuluan

Nama Yusof Rawa menjadi terkenal ketika mengalahkan Tun Dr. Mahathir di kawasan Parlimen Kota Setar Selatan dalam Pilihanraya Umum (Pemilu) 1969. Kejayaan mengalahkan tokoh UMNO yang semakin populer ketika itu menyebabkan beliau dianggap oleh beberapa pemerhati politik sebagai “The Giant Killer”.<sup>1</sup> Tidak heran jika ketokohan seperti ini menyebabkan akhirnya beliau dipilih sebagai Yang DiPertua Agung PAS (Partai Islam se-Malaysia) dan Murshidul Am partai tersebut. Ketokohan beliau dilihat bukan saja membawa partai Islam itu menghadapi perkembangan politik pasca Kepemimpinan Ulama era 1980-an bahkan sekaligus meletakkan PAS sebagai sebuah partai politik tetapi juga gerekat dakwah. Kejayaan memimpin PAS di saat pertembungan di antara orde lama dan baru “Young Turk” di saat kritikal dengan membawa gagasan baru seperti *tajdid hadhari* membuktikan beliau mempunyai pemikiran yang mendahului zamannya. Sejauhmanakah ketokohan dan pemikiran dakwah Yusof Rawa dalam konteks perjuangan politik beliau dapat difahami dan ditauladani memerlukan suatu diskusi ilmiah. Justeru, artikel ini memperkenalkan ketokohan dan pemikiran al-marhum Tuan Haji Yusof Rawa dalam bidang dakwah Islamiah. Ia dimulai dengan menyorot latar belakang ketokohan beliau dan seterusnya membincangkan pemikiran dakwah Islamiyyah beliau.

## Biografi Yusof Rawa

Tuan Haji Yusof Rawa atau Yusof bin Abdullah dilahirkan dalam keluarga sederhana di Acheeh Street, Pulau Pinang pada tahun 1922. Beliau digelar Yusof Rawa justeru merujuk kepada kampung ayahandanya iaitu Haji Abdullah Hj. Nordin yang berasal dari kampung Rawa, Sumatera Indonesia. Selain dari Yusof, Haji Abdullah juga mempunyai tujuh orang anak iaitu Anuar, Jawahir, Kamariah, Abdul Majid, Tahir, Hashim dan Shamsuddin. Haji Abdullah adalah seorang yang alim dan

<sup>1</sup> Malaysia Year Book 1970, (Kuala Lumpur: Malay Mail Publication, 1970), ms. 52. Lihat juga “Yusof Rawa Popular kerana tewaskan Dr. Mahathir.”, dalam Sarina, 123 Januari, 1986, ms. 17.

rajin dalam mengusahakan perniagaan percetakan dan penerbitan yang bernama United Press dan Maktabah Haji Abdullah bin Mohd Nordin al-Rawi. Latar belakang Haji Abdullah yang berilmu dan gigih ini banyak mempengaruhi Yusof Rawa menuntut ilmu dan maju dalam bidang yang dipilihnya. Tidak heranlah jika Yusof Rawa maju dalam bidang perniagaan sehingga menyebabkan beliau dikatakan sebagai pendiri kepada Dewan Perniagaan Melayu Pulau Pinang.<sup>2</sup>

Yusof Rawa memulai pendidikan awalnya di sekolah Rendah Hutan Mayat di Jalan Carnavon sehingga tingkat empat, kemudian berpindah ke Sekolah Chowrasta di Transfer Road dan kemudiannya ke Government English School di mana terdapatnya Special Malay Class. Seterusnya beliau melanjutkan pelajaran di Penang Free School dan berhasil memperolehi Ijazah Junior Cambridge.<sup>3</sup> Setelah memperoleh latarbelakang pendidikan Inggeris yang baik itu, beliau kemudiannya dihantar ke Mekah selama empat tahun di mana beliau belajar di Maahad Dar al-Ulum dan berhasil memperolehi diploma dalam bidang *Takhassus al-Dini* dari Dar al-Falah. Setelah tamat pengajian, Yusof Rawa bekerja di Syarikat M. Husni Gama sebagai Sekretaris sambil mengambil Diploma Pengurusan di Bennette College Shefield England secara gaya pos. Beliau terpaksa dipanggil pulang oleh ibunya atas alasan untuk menguruskan perniagaan keluarga di Pulau Pinang setelah ayahnya meninggal dunia bersamaan dengan ledakan bom tentara Jepun pada tahun 1946.<sup>4</sup>

Yusof Rawa mengakhiri zaman bujang dengan menikahi wanita pilihan ibunya iaitu Kulsum binti Ali dan dikurniakan sebanyak 11 orang cahayamata. Di antaranya ialah Mujahid Yusof Rawa yang meneruskan perjuangan beliau di dalam PAS kini. Di mata keluarganya, beliau adalah seorang ketua keluarga yang tegas menurut disiplin Islam tetapi penyayang. Sifat positif ini turut juga diakui oleh rekan-rekan yang mengelarkannya sebagai *al-Zaim* justeru sifat beliau yang pemurah dan suka membantu itu. Hal ini tergambar secara praktikal dari usaha beliau mendirikan sebuah yayasan bernama *Warathat Haji Yusof Rawa* pada 1996 untuk memanfaatkan hartanya ke jalan Allah. Justeru itu tidak heranlah jika sifat-sifat keperibadian ini

<sup>2</sup> Farish A Noor, *Ustaz Haji Yusof bin Abdullah ar-Rawa Architect of the New Pas of the 1980s*, 1-8 (atas talian) <http://members.tripod.com>. (5 mei 2000).

<sup>3</sup> Haji Yusof Rawa Dalam Kenangan, 1 – 2 (atas talian) [http://www.harakah.daily.com/mei/mei/2000\\_9.html](http://www.harakah.daily.com/mei/mei/2000_9.html) (5Mei).

<sup>4</sup> Rozaman Ismail, “Yusof Rawa Pemimpin Sederhana,” *Utusan Malaysia*, 29 April 2000, ms. 5.

melayakkan beliau dianugerahkan sebagai Jaksa Pendamai dan Tokoh Maal Hijrah Pulau Pinang 1992.<sup>5</sup>

Minat Yusof Rawa terhadap politik diketahui ketika beliau berada di Makkah, sewaktu memegang beberapa jabatan dalam Persatuan Pelajar Semenanjung Tanah Melayu. Beliau secara serius mengasah bakat kepemimpinannya dan sering memberikan ceramah kepada pelajar di sana.<sup>6</sup> Namun minat beliau terpendam seketika justeru menguruskan syarikat penerbitannya. Beliau juga banyak menghabiskan masa menulis buku-buku yang digunakan sebagai rujukan oleh sekolah-sekolah agama pondok ketika itu. Beliau yang pada mulanya menjadi ahli biasa PKMM tetapi kemudiannya beralih arah menganggotai PAS dan mulai aktif bersama Profesor Zulkifli Muhammad. Beliau bertanding dalam pilihanraya umum (Pemilu) pertama dan kedua dalam tahun 1955 dan 1959 tetapi kalah. Beliau yang sebaliknya berhasil memenangi pilihanraya 1969 dengan mengalahkan Dr. Mahathir seterusnya mengekalkan kursi apabila menang tanpa bertanding dalam pilihanraya umum tahun 1974. Ketika PAS berada dalam kerajaan campuran, beliau dilantik sebagai Wakil Menteri Perusahaan Utama di bawah kabinet Tun Abdul Razak dan kemudiannya dilantik pula sebagai Duta Malaysia ke Iran, Afghanistan dan Turki sehingga tahun 1978. Pengalaman luas ini menyebabkan beliau menguasai lebih dari lima bahasa asing dan berkemahiran sebagai seorang diplomat yang cemerlang.<sup>7</sup> Dr. Mohd Hatta Ramli menyifatkan; “Allahyarham adalah merupakan seorang satu-satunya model ulama’ yang tidak konvensional dari segi pergaulan dan pemikiran beliau. Beliau petah bertutur dalam beberapa bahasa.”<sup>8</sup>

Sikap prihatin Yusof Rawa terhadap masalah masyarakat menjadi pencetus kepada penulisan-penulisannya yang bersifat kritikal. Tulisan beliau yang kritis sekitar tahun 1937 sering keluar di *Warta Jenaka*, *Warta Malaya* dan *Warta Ahad* ketika Yusof masih berada di Mekah. Melalui penerbitannya pula, Yusof menerbitkan majalah *al-Islah* dan risalah-risalah perjuangan gerekan Islam seperti Ikhwan al-

<sup>5</sup> Mashitah Ismail, Haji Yusof bin Haji Abdullah al-Rawa (Yusof Rawa) “Peranan dan Sumbangan Dalam Harakah Islamiah,” (1922-2000), Latihan Ilmiah, Jabatan Quran dan Sunnah, FPI UKM, 2002, ms. 16 dan 83.

<sup>6</sup> Subky Latif, Haji Yusof Rawa Dalam Kenangan, *Harakah*, 1 – 5 Jun 2000, ms. 4 – 5.

<sup>7</sup> Ibnu Muslim, *PAS Kuasai Malaysia*, (Kuala Lumpur: GG Edar, 1993), ms. 21.

<sup>8</sup> Mohd Hatta Ramli, “Allahyarham Haji Yusof Rawa.” Dalam Kamaruddin Jaafar (ed.), *Memperingati Yusof Rawa*, (Kuala Lumpur: IKDA Sdn Bhd., 2000), 15.

Muslimun dan Jamaat Islami. Ia memberi ruang awal kepada perkembangan idea dan fikrah gerekan Islam yang kritis di negara ini. Beliau juga mengarang risalah tentang Islam dan mengedarkannya kepada masyarakat non-Muslim di Pulau Pinang sebagai suatu usahanya dalam penyebaran dakwah Islamiah. Beliau juga menerbitkan buku-buku pendidikan seperti buku geografi dalam bahasa Arab bagi kegunaan sekolah agama rakyat di seluruh Tanah Melayu. Beliau juga menghasilkan sebuah kitab tafsir bernama *Tafsir al-Rawi* yang mengandungi tafsiran terhadap surah-surah dalam juzuk Amma. Tafsir tersebut dicetak pada tahun 1950, 1960, 1964, 1968, 1970 dan 1975. Walaupun tafsir tersebut berdasarkan rujukan seperti Muhammad Abdurrahman, al-Syaukani, al-Maraghi dan Imam Tantawi, ia mudah difahami dan mendapat pengiktirafan Majlis Agama Islam dan Adat Istiadat Melayu Kelantan.<sup>9</sup> Yusof Rawa juga berbakat dalam menghasilkan penulisan yang mempunyai nilai kesusastraan yang tinggi. Antaranya ialah buku *Madah Sukma* yang mengisahkan khayalan seorang pemuda terhadap dosa dan neraka ketika berniat pergi bersuka-ria. Pendita Zaaba memuji karya tersebut;

Saya membaca sepantas lalu dan saya mendapati karya ini sangat baik. Selain dari maksud isinya yang mulia itu terdapat di dalamnya beberapa perkataan yang barangkali berguna dalam medan pengajian bahasa. Pemikiran yang menjadikan ianya baik, dan gambaran yang dipetakkan oleh perkataan yang sangat cantik. Saya mendoakan mudah-mudahan gubahan ini berhasil bukan saja tentang laris lakunya, tetapi tentang mencapai maksud yang sangat tinggi yang terbenam di dalam tujuannya itu sebagai mutiara di dalam kulit tiram.”<sup>10</sup>

Sebagai seorang politikus yang tahan uji, beliau gigih meneruskan kembara politiknya sering kalah dalam pilihanraya umum (pemilu). Nasib beliau dalam kepemimpinan tertinggi partai lebih cerah apabila berhasil menewaskan Dato' Abu Bakar Umar untuk jabatan Wakil Presiden PAS dalam muktamar partai ke 25. Beliau memangku jabatan Yang DiPertua PAS pada tahun 1982 apabila Dato' Muhammad Asri mengundurkan diri akibat ledakan kebangkitan orde baru “young turk” dalam PAS.<sup>11</sup> Ketokohan Yusof mungkin diragui apabila seorang ahli akademik Universiti Malaya Dr. Alias Mohammed menyifatkannya sebagai “no more than a figure head” yang hanyalah mewakili “Old Guard” bagi meredakan tentangan golongan

<sup>9</sup> Lihat Yusof bin Abdullah, *Tafsir al-Rawi*, (Pulau Pinang: United Press, 1970) dan Subky Latif, “Yusof Rawa Dalam Kenangan,” *Harakah*, 1 – 15 Jun, 2000, ms. 4.

<sup>10</sup> Lihat Yusof bin Abdullah, *Madah Sukma*, (Pulau Pinang: Maktabah Haji Abdullah bin Mohd Nordin al-Rawi, tt.), ms. 7-8.

<sup>11</sup> Wan Hahim Wan Teh, *Memoir Politik Asri*, (Bangi: Universiti Kebangsaan Malaysia, 1993), ms. 100-103.

konservatif terhadap perubahan radikal yang berlaku di dalam PAS. Namun beliau muncul sebagai seorang tokoh yang berhasil membawa perpaduan serta diterima oleh semua golongan apabila disahkan sebagai Presiden PAS dalam tahun 1983 dan seterusnya dilantik sebagai Murshidul Am PAS setelah melepaskan jabatan atas alasan kesehatan kepada Ustaz Fadhil Noor pada tahun 1989.<sup>12</sup>

Ketokohan Yusof Rawa dalam mengemudikan PAS boleh dilihat dari kemampuannya menghadapi beberapa isu dan tantangan pada saat itu. Beliau adalah tokoh yang berhasil menyatukan PAS setelah dilanda masalah perpecahan internal partai. Beliau berani mengambil keputusan mengantung keanggotaan Dato Asri Muda dan beberapa ahli lain demi menyingkirkan orde lama pada tahun 1982. Perpaduan partai melalui slogan “Kepemimpinan Ulama” telah dilancarkan olehnya dan dikuatkan dengan menghadirkan tokoh-tokoh agama seperti Fadhil Noor, Nik Aziz Nik Mat dan Haji Hadi Awang. Di bawah kepemimpinannya PAS mengorak langkah dengan pendekatan dakwah yang terbuka bagi menentang pemikiran *asabiyah* orde lama. Perlembagaan PAS dipinda bagi mendirikan Majlis Syura Ulama dan meletakkan ulama sebagai pemimpin utama yang digelar Murshid Am. Ia kekal menjadi institusi yang mempertahankan Islam sebagai dasar perjuangan PAS hingga kini.

Ketegasan Yusof Rawa dalam perjuangan PAS juga diarahkannya kepada UMNO apabila dia dengan tegas menentang tindakan Tun Mahathir menyekat kuasa raja-raja Melayu melalui pindaan Perlembagaan Persekutuan 1983. PAS mengambil sikap mempertahankan raja-raja Melayu walaupun menentang Asabiyah karena menghalangi pengambilalihan kuasa oleh Perdana Menteri. Yusof Rawa juga dengan lantang menentang pada penggunaan ISA (Subversif) sehingga berlakunya Peristiwa Memali yang membunuh Ustaz Ibrahim Libya pada tahun 1985. Beliau tetap berjuang bersama PAS pada ketika itu agenda Islamisasi yang dilancarkan oleh kerajaan mendapat sambutan rakyat akibat penyertaaan Anwar Ibrahim di dalam kerajaan pada 1982. Beliau yang menyifatkan tindakan Anwar itu sebagai menikam PAS dari belakang terus istiqamah memimpin PAS. Peranan beliau diakui oleh M.G.G. Pillay; “Haji Yusof Rawa’s role in all this, although he had left the PAS presidency 12 years

<sup>12</sup> Kamarul Nizam Abdullah, *The Politics of Islam in Contemporary Malaysia*, (Bangi: Penerbit

ago, is crucial. He was a father figure the PAS Islamists had, but his role went beyond that of a figurehead.”<sup>13</sup>

Tokoh PAS ini sering sakit ketika diujung usianya. Kesehatan Yusof semakin parah setelah kematian isterinya Kulsum pada tahun 1994. Beliau yang mengidap penyakit kencing manis, jantung dan paru-paru berair selama lebih dari sepuluh tahun akhirnya dimasukkan ke pusat rawatan rapi (ICU) Hospital Ireland di Jalan Mc Alister Pulau Pinang pada 19 Maret 2000. Beliau dibawa pulang ke rumahnya di Jalan Sultan Azlan Shah di Gelugor setelah lima hari dirawat di sana dan akhirnya menghembuskan nafasnya yang terakhir di hadapan keluarganya setelah menunaikan solat subuh berjemaah pada pagi hari Juma’at 28 April 2000. Banyak rekan dan taulan menziarahi jenazah beliau termasuk Presiden PAS Dato’ Fadhil Noor dan Ketua Menteri Pulau Pinang Tan Sri Koh Tsu Koon. Jenazah beliau selamat dikebumikan di tanah perkuburan Islam Jalan Dato Keramat Pulau Pinang.<sup>14</sup> Sesungguhnya kepergian almarhum merupakan kehilangan seorang tokoh gerekan Islam yang sangat besar artinya. Tuan Guru Nik Abdul Aziz Nik Mat menyatakan;

“Allahyarham Haji Yusof Rawa adalah seorang pemimpin yang disegani di dalam dan di luar Negara sebagai seorang pejuang Islam bersemangat kental. Allahyarham akan dikenang jasanya sepanjang hayat memandangkan pengorbanan untuk gerekan Islam yang sangat besar. Beliau sanggup berdepan dengan apa jua suasana demi untuk memartabatkan Islam di Negara ini. Sewaktu PAS di bawah pimpinannya, ada wakil rakyat PAS yang menyertai UMNO. Namun begitu beliau tidak patah semangat untuk meneruskan perjuangannya. Kemantapan PAS yang dibina sekarang adalah hasil semangat dan ketulusan Allahyarham dalam perjuangan dan pemimpin-pemimpin yang ada sekarang cukup terhutang budi di atas semangatnya yang tidak pernah pudar untuk mengangkat martabat Islam.”<sup>15</sup>

Kepergian Yusof Rawa tidak diragukan lagi begitu dihormati oleh rekan dan lawan politik beliau. Ketokohan beliau walaupun kurang cemerlang sebagaimana kepemimpinan ulama selepasnya, beliau tetap dikenang sebagai seorang yang meninggalkan warisan kepemimpinan ulama dalam PAS. Keturunannya Mujahid Yusof Rawa ditinggalkan untuk menyambung perjuangannya tidak dapat lari dari

---

Universiti Kebangsaan Malaysia, 2002), ms. 41-42.

<sup>13</sup> M.G.G. Pillay, “Haji Yusof Rawa (1921 – 2000): A Political Assessment.” Dalam Kamaruddin Jaafar (ed.), *Memperingati Yusof Rawa*, (Kuala Lumpur: IKDA Sdn Bhd., 2000), 21 – 25.

<sup>14</sup> Lihat *The Sun*, 29 April 2000, *The Star*, 29 April 2000, *Utusan Malaysia*, 29 April 2000, *Berita Harian*, 29 April 2000 dan *The New Straits Times*, 29 April 2000.

<sup>15</sup> Haji Yusof Rawa Pejuang Silam Bersemangat Kental, 1–2 (atas talian) [http://www.harakah.daily.com/apr/apr/2000\\_5.html](http://www.harakah.daily.com/apr/apr/2000_5.html).

dasar kepemimpinan ulama ini, walaupun Mujahid mempunyai ketokohnanya yang tersendiri.

### Pemikiran Dakwah Yusof Rawa

Kehadiran Yusof Rawa memimpin PAS serentak dengan ledakan kebangkitan kembali Islam di Malaysia era 1970-an. Ledakan yang bertambah kuat itu mula menyebabkan PAS yang dipimpin oleh Dato' Muhammad Asri tidak begitu populer di mata gerekan dakwah ketika memasuki era 1980-an itu. Pemikiran Dato' Asri yang dianggap lebih beracuan kebangsaan Melayu tidak sesuai dengan arus kebangkitan Islam pada waktu itu. Yusof mencoba menjelaskan tujuan pemikiran baru era ulama PAS dengan katanya;

“Perbedaan pimpinan dulu dan sekarang ialah walaupun dahulu perjuangan itu perjuangan Islam tetapi gambaran di luar seolah-olah PAS di bawah selimut perkauman. Sedangkan sekarang ini PAS telah berhasil keluar dari selimut perkauman itu. Memanglah perjuangan PAS itu perjuangan Islam tetapi oleh karena knowledge manusia tentang Islam dan politik Islam berkurangan, oleh itu gambaran yang ada pada ketika itu ialah PAS berjuang untuk orang Melayu. Tetapi pemimpin PAS tidak berasa begitu, oleh karena pengikut-pengikut PAS itu terdiri dari orang Melayu yang Islam, maka partai itu seolah-olah partai Melayu. Perkara ini sudah berubah sejak 15 tahun yang lalu apabila kemajuan-kemajuan dalam PAS meletakkan semula pimpinan ulama, maka dengan sendirinya corak Islam itu bertambah jelas. Kalau dulu nampak gambar itu seperti kabur tetapi sekarang ini gambar tersebut bertambah jelas.”<sup>16</sup>

Kemunculan Haji Yusof sebagai pemimpin utama PAS dianggap sebagai perintis ke arah era kepemimpinan ulama. Walaupun konsep kepemimpinan ulama dikatakan telah lama ada dalam detik nadi perjuangan PAS sejak didirikan, kebangkitan kepemimpinan baru yang mengantikan zaman Asri menyemarakkan lagi idealisme berkenaan di dalam partai. Beliau juga dituduh mengambil inspirasi dari kejayaan revolusi pimpinan Islam Iran tahun 1979, walaupun ianya kadangkala dinafikan oleh para pimpinan PAS. Haji Yusof sebaliknya menyanjung kejayaan revolusi tersebut dalam kata-katanya; “keistemewaan revolusi Islam Iran dari revolusi2 yang pernah berlaku di negara2 umat Islam yang lain, ialah revolusi Islam di Iran digerakkan oleh cetusan hati nurani umat Islam Iran seluruhnya yang berpaut rapat kepada Islam yang dipimpin oleh para ulama. Revolusi Islam di Iran bukan revolusi elit angkatan tentara yang mempunyai keghairahan berpolitik seperti yang sering berlaku di bahagian-bahagian lain dunia Islam. Karena itu Revolusi Iran

mempunyai dasar yang kukuh bagi mendapatkan kebebasan yang hakiki untuk melaksanakan kewajipan mendaulatkan agama Allah dalam segenap bidang kehidupan dan dapat pula menggagarkan paksi kekuasaan Mustakbirin Amerika sehingga kendur keangkuhan dan kesombongannya. Kejayaan revolusi Islam Iran ini menambahkan lagi keyakinan kita terhadap kejayaan Islam di masa hadapan ...dan menambahkan lagi keazaman kita untuk terus berjuang dan bekerja untuk Islam tanpa takut menghadapi celaan orang yang suka mencela.”<sup>17</sup>

Mungkin justeru kekaguman dan pemujaan Yusof terhadap pemikiran radikal seperti revolusi Islam Iran menyebabkan PAS dikritik dari ramai pihak termasuk dari Dato’ Asri sendiri. Beliau didakwa memberi komen sebagai; “Sikap yang radikal, terlalu radikal, sikap yang memandang kita saja betul, orang lain semuanya tidak betul. Sikap ini ialah sikap yang merbahaya, sikap yang tidak ada tolak ansur. Masyarakat tidak akan dapat dibina dengan sikap yang seperti itu. malah tidak ada sebuah pun masyarakat di dunia ini yang dapat hidup dengan cara seperti itu.”<sup>18</sup> Komentar ini menjelaskan bahwa terdapat perbedaan yang jelas di antara Dato Asri seorang tokoh yang mempunyai pemikiran dakwah yang sederhana dan boleh bekerjasama dengan pemerintah dengan Yusof Rawa yang memilih corak perjuangan yang agak radikal.

Walau apa pun tanggapan, perjuangan bercorak nasionalisme semakin ditinggalkan oleh Yusof Rawa. Bahkan beliau menyifatkan kepemimpinan Dato Asri yang pada suatu ketika mengistiharkan partainya sebagai nasionalis kemudian sebagai Islam kemudiannya kembali kepada nasionalis liberal adalah seperti politikus yang kecewa dan tiada pendirian dalam perjuangan.<sup>19</sup> Pemikiran dakwah Yusof semakin kritis terhadap perjuangan nasionalisme ketika mengaitkan UMNO dengan perjuangan Asabiyah yang sempit. Beliau mendakwa bahwa orang Melayu mundur disebabkan amalan sistem asabiyah yang zalim dan menindas. Corak perjuangan Asabiyah yang mementingkan kelompok ini dianggapnya tidak berusaha membentuk

<sup>16</sup> Yusof Harun, *Dialog dengan Pemimpin*, (Kuala Lumpur: Penerbitan Pena, 1986), ms. 298.

<sup>17</sup> Yusof Rawa, “Ke Arah Pembebasan Ummah,” Ucapan Dasar Muktamar Tahunan Ke-29 Parti Islam SeMalaysia (PAS) pada 29 April 1983 di Dewan Bahasa dan Pustaka Kuala Lumpur.

<sup>18</sup> Rosnah Majid, *Koleksi Temuramah Khas Dengan Tokoh-tokoh*, (Kuala Lumpur: Utusan Melayu Publications and Distributor Sdn. Bhd., 1985).

<sup>19</sup> Badlihisham Mohd Nasir, “Da’wah in PAS: A Study of Pronouncements of the Party Leaders”, *Jurnal Fikrah*, jilid 2 Januari-Disember 1999.

identitas masyarakat Malaysia bahkan hanya menambahkan lagi jurang polarisasi di antara kaum. Beliau mengemukakan contoh di mana perjuangan kebangsaan seperti ini menyebabkan timbulnya kerusuhan kaum pada 13 Mei 1969, sedangkan kerusuhan tidak berlaku di negeri Kelantan yang diperintah oleh PAS.<sup>20</sup>

Namun demikian, beliau secara apologetik terpaksa mengakui bahwa perjuangan Dr. Burhanuddin yang lebih menekankan kebangsaan Melayu adalah bersesuaian dengan suasana menuntut kemerdekaan ketika itu. Beliau walau bagaimanapun menafikan Dr. Burhanuddin seorang yang berfahaman nasionalis. Baginya, jika Dr. Burhanuddin berideologikan faham nasionalis beliau pasti tidak akan memilih PAS sebagai wadah perjuangan. Justeru itu, Burhanuddin tidak kekal dalam PKMM yang dikatakan lebih bersifat nasionalis berbanding UMNO.<sup>21</sup> Sebaliknya, Yusof Rawa tetap berkeyakinan bahwa perjuangan orang-orang Melayu hendaklah berdasarkan prinsip Islam yang lebih bersifat universal. Beliau memberikan ingatan;

“Kita tidak boleh menyempitkan keadilan Islam hanya untuk orang-orang Melayu. Sekiranya keadilan Islam, kebaikan Islam dan kesempurnaan Islam dikhusruskan kepada segolongan manusia, bermakna kita telah menyimpang dari risalah Islam yang bersifat ‘alamiyyah (universal) sedangkan Islam diturunkan untuk menyelamatkan manusia seluruhnya tanpa mengira warna keturunan. Keadilan Islam adalah untuk semua, walaupun terhadap orang kafir yang bermusuhan dengan kita.”<sup>22</sup>

Selaras dengan itu, PAS memulakan langkah agresif mendekati golongan bukan Islam sebagaimana yang diperjuangkan oleh gerakan dakwah seperti ABIM. Walaupun usulan membuka keanggotaan bersekutu kepada bukan Islam ini pernah diajukan oleh Profesor Zulkifli, PAS di bawah kepemimpinan Yusof Rawa memulai usaha yang serius ke arah tujuan itu. Beliau amat menyadari bahwa adalah mustahil untuk PAS memerintah sekiranya tidak mendapat dukungan dari golongan bukan Islam. Tindakan ini selaras dengan hasrat kepemimpinan ulama supaya Islam dapat

<sup>20</sup> Yusof Rawa, “Mengempur Pemikiran Assabiyyah,” Ucapan Dasar Muktamar Tahunan Ke-30 Parti Islam SeMalaysia (PAS) pada 13 April 1984 di Alor Star Kedah.

<sup>21</sup> *Harakah*, 21 Ogos 1987.

<sup>22</sup> Yusof Rawa, “Teguhkan Jamaah Teruskan Jihad,” Ucapan Dasar Muktamar Tahunan Ke-32 Parti Islam SeMalaysia (PAS) pada 26 September 1986 di Dewan PAS Rusila Marang Terengganu.

diterima sebagai panduan dalam menyelesaikan masalah masyarakat majemuk yang dihadapi oleh Negara.<sup>23</sup>

Berbekalkan pemikiran dakwah yang terbuka ini, PAS mengadakan inisiatif menemui masyarakat non-Muslim. Paling mengemparkan masyarakat Malaysia ialah apabila PAS mengadakan dialog dengan kaum Cina di dewan Perhimpunan Cina Selangor, Kuala Lumpur pada tahun 1986. Satu sepanduk dalam tulisan Cina memaparkan “Gerekan Kebangkitan Islam” telah disiarkan oleh sebuah akhbar Cina pada keesokan harinya.<sup>24</sup> Untuk memperlihatkan keterbukaan era kepemimpinan ulama ini, PAS mendirikan Chinese Consultative Councils (CCC) menjelang pilihanraya tahun 1986. Di antara perkara yang disepakati ialah hak-hak kebebasan bersuara, keadilan sosial antara kaum dan penghapusan klasifikasi bumiputera dan bukan bumiputera.<sup>25</sup> PAS juga menyertai pakatan pembangkang dengan parti NASMA, PRSM dan SDP dalam Barisan Harakah Keadilan Rakyat (HAK).<sup>26</sup>

Pemikiran baru Yusof Rawa diuji melalui Pilihanraya 1986 yang sememangnya getir buat PAS justeru sikap keterbukaannya kepada kaum bukan Melayu. Apakah pemikiran Yusof Rawa membela perjuangan membela orang-orang Melayu lantaran pertukaran arus perjuangan ke arah sebuah gerakan Islam yang hakiki? Apakah isu-isu seperti menghapuskan bahasa kebangsaan sebagai bahasa resmi, hak-hak keistimewaan orang Melayu dan lain-lainnya menikam PAS sehingga partai itu kalah dalam pilihanraya tersebut. Kekalahan ini juga mengundang kritikan bahawa gagasan pemikiran dakwah politik Yusof Rawa adalah terlalu ideal untuk dilaksanakan dalam realitas politik di Negara ini.<sup>27</sup> Namun sebagai seorang pejuang yang berjiwa kental, Yusof Rawa tetap tidak mau bergeming dari gagasan pemikiran dakwah-politik yang telah dipeloporinya. Beliau menegaskan;

<sup>23</sup> Nakhiae Haji Ahmad “Islam Mengatur Masyarakat Majmuk,” dalam *PAS Dengan Masyarakat Majmuk*, (Kuala Lumpur: Jabatan Penerangan dan Penyelidikan PAS Pusat, 1987), ms. 15.

<sup>24</sup> Ibid., ms. 23.

<sup>25</sup> Lihat *Dewan Masyarakat*, 11 November 1985, *Utusan Malaysia*, 12 Februari 1985, Era 1986 dan *Dewan Masyarakat*, Julai 1986.

<sup>26</sup> Lihat *Era*, 21 Julai 1986 dan *Dewan Masyarakat*, 8 Ogos 1986. Perbincangan lanjut mengenai pandangan Yusof Rawa terhadap pemikiran nasionalisme, ummah dan bangsa Malaysia boleh dirujuk kepada Jaffary Awang, “Notions of Ummah in Islam: The Response of Malay Muslim Intellectuals in Malaysia,” Tesis Ph.D, Universiti Birmingham, 2000. ms. 202-223.

“Kegiatan politik kita mestilah berhubung kait dengan peranan dakwah Islamiah secara keseluruhannya. Demikian juga dengan manhaj dakwah. Kita mestilah menyusun kegiatan politik Islam ialah simpati dan dukungan orang ramai terhadap perjuangan menegakkan cita-cita Islamiyyah yang diperjuangkan oleh jamaah kita. Ini adalah karena politik dan kegiatan politik berhubungkait dengan dukungan orang ramai. Oleh itu kegiatan politik Islam yang berkesan mestilah menolak idea pengasingan diri dari orangramai. Jika sesuatu jemaah Islam, di dalam kegiatan politiknya mengambil sikap mengasingkan diri dari orangramai dan tidak merancang supaya diwujudkan hubungan baik dengan segenap peringkat masyarakat, maka jamaah itu sebenarnya, melakukan sesuatu yang berlawanan dengan kaedah politik Islam. Kegiatan politik hendaklah difahami sebagai seni yang mempertemukan orangramai, seni mempengaruhi orangramai dan seni menguasai orangramai dan mengarahkan mereka kepada matlamat perjuangan yang hendak dituju oleh jamaah.”<sup>28</sup>

Sesuai dengan tujuan kepemimpinan ulama yang dipeloporiya, Yusof Rawa memberi tumpuan serius kepada usaha memperbaiki kepemimpinan dan pengurusan partai agar ia sentiasa selaras dengan tuntutan perjuangan.<sup>29</sup> Usaha beliau ini dapat dilihat dari gagasan pemikiran *Tajdid Hadhari* yang menjadi tujuan dari kefahaman *Fikrah al-Amal* PAS yang bukan saja hanya menumpukan aspek kerohanian semata-mata bahkan melibatkan perjuangan untuk merubah masyarakat. Beliau menegaskan;

“Perjuangan Partai Islam SeMalaysia (PAS) ialah perjuangan untuk mengubah waqi atau realitas masyarakat manusia yang ada sekarang ini terkongkong di dalam jaringan dan terkongkong dalam arahan peradaban Jahiliyyah. Waqi atau realitas yang ada sekarang ini menuntut perubahan supaya masyarakat manusia dibebaskan dari jaringan itu sebagai membolehkan kita menuju ke arah peradaban Islam atau Hadharah Rabbaniyyah. Keupayaan untuk menggerakkan perubahan yang sedemikian itu dari satu marhalah kepada marhalah yang alin adalah satu proses pengislaman yang sebenarnya. Pengislaman bukan satu proses tanpa dasar atau slogan politik murahan untuk mendapat dukungan, sedangkan slogan itu tidak membawa apa-apa perubahan kepada realitas jahiliyyah yang ada. Pengislaman yang sebenar ialah satu perubahan menuju pembebasan dari Hadarah Assabiyyah Jahiliyyah yang menggerakkan kehidupan kepada pembentukan hadarah Islamiyyah dengan keupayaan iman, fikiran, ilmu, amal, akhlak dan tanzim yang menyeluruh.”<sup>30</sup>

<sup>27</sup> Hussain Mohamed, “BN Menang dalam kekalutan lawan,” *Dewan Masyarakat*, 9 September 1986, ms. 21.

<sup>28</sup> Yusof Rawa, “Teguhkan Jamaah Teruskan Jihad,” Ucapan Dasar Muktamar Tahunan Ke-32 Parti Islam SeMalaysia (PAS) pada 26 September 1986 di Dewan PAS Rusila Marang Terengganu.

<sup>29</sup> Lihat pendekatan kepimpinan baru PAS dalam Akmar Madiah Abdullah, “Parti Islam SeMalaysia (PAS): Kajian Khusus Terhadap Organisasi dan Kepimpinan,” Latihan Ilmiah, Jabatan Pengajian Dakwah dan Kepimpinan, FPI UKM, 2002.

<sup>30</sup> Yusof Rawa, “Ke Arah Tajdid Hadhari,” Ucapan Dasar Muktamar Tahunan Ke-33 Parti Islam SeMalaysia (PAS) pada 10 April 1987 di Dewan Besar Markaz Tarbiyyah PAS Pusat, Kuala Lumpur.

Yusof Rawa selanjutnya menjelaskan pemikiran beliau tentang *Tajdid Hadhari* yang bertujuan mengembalikan umat kepada ‘aqaliyyah Islamiyyah bagi menilai tamadun yang sebenarnya dengan Islam, bukan dengan ukuran madiyyah karena Islam telah mendedahkan tamadun Parsi dan Rom yang kaya raya itu sebagai tamadun jahiliyyah, dan mereka yang hanya terpengaruh dengan unsur-unsur kebendaan baik berpaling ke arah timur dan barat dalam perjuangan kononnya untuk meninggikan syakhsiyah Negara dan umat adalah mengulangi pembinaan hadarah mengikut ukuran zaman jahiliyyah bentuk moden. Beliau secara kritis menjelaskan bahwa *Tajdid Hadhari* bukanlah berkisar di sekitar tarbiyyah, tamrin, seminar dan usrah secara jumud, tetapi meliputi pandangan dunia hingga akhirat, dengan menyatakan pembinaan tamadun yang melibatkan roh dan jasad, individu dan jamaah yang berjuang untuk memerintah dunia dengan hukum Allah sehingga menjadi jambatan menuju akhirat, atau dengan lain pengertian Islam sebagai ad-Din wajiblah ditegakkan di dalam sebuah Negara Islam.<sup>31</sup> Konsep pemikiran ini selaras dengan banyak tokoh pembaharu dunia Islam seperti Ismail Faruqi dan Naquib Al-Attas yang berusaha mengembalikan konsep *syumuliah* Islam sebagai agama yang sempurna.<sup>32</sup> Pemikiran ini juga yang memberi arah yang jelas dalam membangun peradaban dalam Islam.<sup>33</sup> Tajdid dalam Islam bukanlah mengemukakan sesuatu yang baru, namun mengembalikan kepada *asholah* Islam yang sebenarnya.<sup>34</sup> Justeru itu, Yusof Rawa mencoba mencapai realitas pemikiran *Tajdid Hadharinya* dengan membangun PAS sebagai Hizbulah atau Partai Allah. Hal itu dilandaskan kepada ayat 56 surah al-Maidah yang artinya; “Dan barangsiapa yang mengambil Allah, Rasul-Nya dan orang-orang yang beriman menjadi walinya, maka sesungguhnya Hizbulah itulah yang mencapai kemenangan.” Pemikiran radikal ini dianggap begitu kontroversi

<sup>31</sup> Yusof Rawa, “Bertekad Membulatkan Jemaah,” Ucapan Dasar Muktamar Tahunan Ke-34 Parti Islam SeMalaysia (PAS) pada 8 April 1988 di Dewan Besar Markaz Tarbiyyah PAS Pusat, Kuala Lumpur.

<sup>32</sup> Abdur Razzaq (2018). Islamic Civilization of Malay: Historical Polemic and Modern Challenges (The Thought of Syed Naquib Al-Attas). Journal of Malay Islamic Studies [Internet]. 31Dec.2018 [cited 12Apr.2020];2(2):125-32. Available from: <http://jurnal.radenfatah.ac.id/index.php/jmis/article/view/3778>.

<sup>33</sup> Ridho, Sari Lestari Zainal; Razzaq, Abdur; Mellita, Dina. (2017). *Civilization, Education and Population Age Specific: A Comparison Between Islamic and Non Islamic Countries*. *Advanced Science Letters*, Volume 23, Number 9, September 2017, pp. 8243-8246(4). *American Scientific Publishers*. DOI: <https://doi.org/10.1166/asl.2017.9869>.  
<https://www.ingentaconnect.com/content/asp/asl/2017/00000023/00000009/art00043>.

<sup>34</sup> Baiti, Rosita; Razzaq, Abdur. (2017). *Esensi Wahyu Dan Ilmu Pengetahuan*, Wardah 18 (2), 163-180. <http://jurnal.radenfatah.ac.id/index.php/warda/article/view/1776>.

justeru mengaitkan PAS sebagai Partai Allah; sehingga timbul pertanyaan sinis; adakah Tuhan juga berpolitik.? Bila Allah mendaftar sebagai pengundi dalam pilihanraya.? Sebagai seorang yang kuat bepegang kepada prinsip yang digariskan beliau tanpa ragu-ragu, menerangkan bahwa PAS memang berusaha menjawai tuntutan ayat terebut. Ciri-ciri kepemimpinan yang telah ditetapkan oleh ayat tersebut mencoba dilaksanakan sebaik mungkin meski pun kemenangan kepada gerakan dakwah masih belum terjadi. Bagi Yusof Rawa, pendekatan tersebut adalah lebih baik dari perjuangan golongan ulama bayaran yang bersekongkol dengan golongan nasionalis untuk menjatuhkan gerakan yang jelas beriltizam dengan perjuangan Islam. Beliau menegaskan soal mempergunakan Islam tidak berbangkit karena menurutnya Islam memang diturunkan bagi digunakan dalam seluruh aspek kehidupan termasuk perjuangan politik.<sup>35</sup>

Di balik tuduhan bahwa pemikiran Yusof Rawa mengenai dakwah adalah radikal, keras dan non-kompromi masih terdapat pandangan yang mengambarkan pendekatan yang berlandaskan hikmah. Ini bisa dilihat dari pengakuannya bahwa PAS tetap mengamalkan pendekatan *muwajahah silmiyyah* serta sanggup bekerjasama dengan seteru politiknya UMNO atau berbagai kelompok baik Muslim maupun non-Muslim. Selain berhasil mengadakan kerjasama dengan CCC, PAS mempelopori langkah mengadakan *Tahaluf Siyasi*-nya dengan Semangat 46 melalui gabungan Angkatan Perpaduan Ummah yang kemudiannya berhasil menguasai Kelantan dalam Pilihanraya Umum (Pemilu) 1990. Beliau juga bersikap terbuka dalam mengadakan kerjasama dengan gerakan Islam walaupun dilihat sering mengkritik gerakan berkenaan justeru sikap mereka yang dianggap negatif terhadap perjuangan politik PAS. Beliau juga memiliki sikap terbuka menerima golongan profesional dan pengusaha ke dalam partai. Kombinasi ulama dan profesional yang dipopulerkan oleh beliau ini terbukti berhasil mengokohkan organisasi PAS. Ini diakui oleh Dr. Hatta yang menilai bahwa penyertaan golongan tersebut di era kepemimpinan beliau sebagai kemunculan gelombang pertama sebelum kebangkitan gelombang reformasi yang dicetuskan oleh Anwar Ibrahim.<sup>36</sup>

---

<sup>35</sup> Ibid.

<sup>36</sup> Mohd Hatta Ramli, "Allahyarham Haji Yusof Rawa." Dalam Kamaruddin Jaafar (ed.), *Memperingati Yusof Rawa*, (Kuala Lumpur: IKDA Sdn Bhd, 2000), 15. Lihat juga Nor Kamar Nordin, "Stail dan Pemikiran Pemimpin PAS," Latihan Ilmiah, Jabatan Usuluddin dan Falsafah, FPI UKM, 1991.

Arus pemikiran dakwah yang lebih terbuka mengantikan pendekatan mirip nasionalis era orde lama bukan saja mengubah PAS dari sebuah partai politik kepada sebuah Gerekan dakwah tetapi memberi inspirasi kepada kebangkitan reformasi yang lebih luas. Namun penularan pemikiran modernis sehingga mencetuskan gerakan liberal hari ini tidak terdapat dalam pemikiran dakwah Yusof Rawa, walaupun dari satu sisi beliau dianggap mempelopori keterbukaan dalam membangun pendekatan politik partai.

## Kesimpulan

Berdasarkan kajian dan perbincangan di atas, tidak nafikan lagi bahwa Tuan Haji Yusof Rawa merupakan seorang tokoh yang mempunyai banyak sumbangan kepada masyarakat melalui keterlibatannya dalam penerbitan buku-buku agama. Peranan dalam pula dapat dilihat dari ketokohnya mengendalikan zaman transisi orde lama kepada orde baru selaras dengan tuntutan zaman. Beliau berhasil menjadi seorang bapak kepada partai dan menegakkan dasar fundamental yang menjadi dasar dan kompas kepada perjalanan partai seterusnya. Walaupun beliau mencetuskan berbagai ide dan pemikiran yang melambangkan keterbukaan PAS kepada perubahan zaman, beliau sangat arif menggariskan idealisme partai hingga kekal utuh ke hari ini. Walaupun ketokohnya dalam mencetuskan pemikiran dakwah yang lebih mirip kepada *PAS-centric* serta diselubungi dengan kontroversi pada ketika itu, beliau telah mendahului banyak pihak dalam memperkenalkan gagasan besar seperti *tajdid hadhari* yang kemudian diakui menjadi sumber inspirasi kepada gagasan Islam *hadhari* yang dilancarkan oleh pemerintahan UMNO pimpinan Tun Abdullah Ahmad Badawi. Kedua-dua gagasan ini dilihat menenggelamkan polisi Penerapan Nilai-nilai Islam ciptaan Tun Mahathir Muhamad pada era 1980an. Bagi PAS, ia merupakan kemenangan intelektual yang menutup pengkritik bahwa kepemimpinan ulama tidak relevan dengan perkembangan zaman.

## Daftar Pustaka

- Abdullah, Akmar Madiyah. (2002). "Partai Islam SeMalaysia (PAS): Kajian Khusus Terhadap Organisasi dan Kepemimpinan," Latihan Ilmiah, Jabatan Pengajian Dakwah dan Kepemimpinan, FPI UKM.

Abdullah, Kamarul Nizam. (2000). *The Politics of Islam in Contemporary Malaysia*. Bangi: Penerbit Universiti Kebangsaan Malaysia.

Abdullah, Yusof bin. T.th. *Madah Sukma*. Pulau Pinang: Maktabah Haji Abdullah bin Mohd Nordin al-Rawi.

Abdullah, Yusof bin. (1970). *Tafsir al-Rawi*. Pulau Pinang: United Press.

Ahmad, Nakhaie Haji. (1987). "Islam Mengatur Masyarakat Majmuk," dalam *PAS Dengan Masyarakat Majmuk*. Kuala Lumpur: Jabatan Penerangan dan Penyelidikan PAS Pusat.

Awang, Jaffary. (2000). "Notions of Ummah in Islam: The Response of Malay Muslim Intellectuals in Malaysia," Tesis Ph.D, Universiti Birmingham.

Baiti, R., & Razzaq, A. (2018). Esensi Wahyu Dan Ilmu Pengetahuan. *Wardah*, 18(2), 163-180. <http://jurnal.radenfatah.ac.id/index.php/warda/article/view/1776>.

*Berita Harian*, 29 April 2000

*Dewan Masyarakat*, 8 Ogos 1986.

*Dewan Masyarakat*, 11 November 1985.

*Dewan Masyarakat*, Julai 1986.

*Era*, 21 Julai 1986

Haji Yusof Rawa Dalam Kenangan, 1–2 (atas talian) <http://www.harakah.daily.com/mei/mei/20009.html> (5Mei).

Haji Yusof Rawa Pejuang Silam Bersemangat Kental, 1–2 (atas talian) <http://www.harakah.daily.com/apr/apr/20005.html>.

*Harakah*, 21 Ogos 1987.

Harun, Yusof. (1986). *Dialog dengan Pemimpin*, Kuala Lumpur: Penerbitan Pena.

Ismail, Mashitah. (2002). Haji Yusof bin Haji Abdullah al-Rawa (Yusof Rawa) "Peranan dan Sumbangan Dalam Harakah Islamiah," (1922-2000), Latihan Ilmiah, Jabatan Quran dan Sunnah, FPI UKM.

Ismail, Rozaman. "Yusof Rawa Pemimpin Sederhana," *Utusan Malaysia*, 29 April 2000.

Latif, Subky. "Yusof Rawa Dalam Kenangan," *Harakah*, 1 – 15 Jun, 2000.

Majid, Rosnah. (1985). *Koleksi Temuramah Khas Dengan Tokoh-tokoh*. Kuala Lumpur: Utusan Melayu Publications and Distributor Sdn. Bhd.

*Malaysia Year Book 1970*, (Kuala Lumpur: Malay Mail Publication, 1970).

Mohamed, Hussain “BN Menang dalam kekalutan lawan,” *Dewan Masyarakat*, 9 September 1986.

Muslim, Ibnu. (1993). *PAS Kuasai Malaysia*, Kuala Lumpur: GG Edar.

Noor, Farish A. *Ustaz Haji Yusof bin Abdullah ar-Rawa Architect of the New Pas of the 1980s*, 1-8 (atas talian) <http://members.tripod.com>. (5 mei 2000).

M.G.G. Pillay, “Haji Yusof Rawa (1921 – 2000): A Political Assessment.” Dalam Kamaruddin Jaafar (ed.), *Memperingati Yusof Rawa*, (Kuala Lumpur: IKDA Sdn Bhd., 2000).

Nasir, Badlihisham Mohd. 1999. “Da’wah in PAS: A Study of Pronouncements of the Party Leaders”, *Jurnal Fikrah*, jilid 2 Januari-Disember 1999.

Ramli, Mohd Hatta. (2000). “Allahyarham Haji Yusof Rawa.” Dalam Kamaruddin Jaafar (ed.), *Memperingati Yusof Rawa*. Kuala Lumpur: IKDA Sdn Bhd.

Razzaq A. (2018). Islamic Civilization of Malay: Historical Polemic and Modern Challenges (The Thought of Syed Naquib Al-Attas). *Journal of Malay Islamic Studies* [Internet]. 31Dec.2018 [cited 12Apr.2020];2(2):125-32. Available from: <http://jurnal.radenfatah.ac.id/index.php/jmis/article/view/3778>.

Ridho, Sari Lestari Zainal; Razzaq, Abdur; Mellita, Dina. (2017). *Civilization, Education and Population Age Specific: A Comparison Between Islamic and Non Islamic Countries*. *Advanced Science Letters*, Volume 23, Number 9, September 2017, pp. 8243-8246(4). *American Scientific Publishers*. DOI: <https://doi.org/10.1166/asl.2017.9869>.  
[https://www.ingentaconnect.com/content/asp/asl/2017/00000023/00000009/art\\_00043](https://www.ingentaconnect.com/content/asp/asl/2017/00000023/00000009/art_00043).

*Sarina*, 123 Januari, 1986, ms. 17.

The New Straits Times, 29 April 2000.

*The Star*, 29 April 2000

*The Sun*, 29 April 2000.

*Utusan Malaysia*, 12 Februari 1985

*Utusan Malaysia*, 29 April 2000

Wan Teh, Wan Hahim. (1993). *Memoir Politik Asri*, (Bangi: Universiti Kebangsaan Malaysia,).

Yusof Rawa, “Ke Arah Pembebasan Ummah,” Ucapan Dasar Muktamar Tahunan Ke-29 Partai Islam SeMalaysia (PAS) pada 29 April 1983 di Dewan Bahasa dan Pustaka Kuala Lumpur.

Yusof Rawa, “Mengempur Pemikiran Assabiyah,” Ucapan Dasar Muktamar Tahunan Ke-30 Partai Islam SeMalaysia (PAS) pada 13 April 1984 di Alor Star Kedah.

Yusof Rawa, “Teguhkan Jamaah Teruskan Jihad,” Ucapan Dasar Muktamar Tahunan Ke-32 Partai Islam SeMalaysia (PAS) pada 26 September 1986 di Dewan PAS Rusila Marang Terengganu.

Yusof Rawa, “Ke Arah Tajdid Hadhari,” Ucapan Dasar Muktamar Tahunan Ke-33 Partai Islam SeMalaysia (PAS) pada 10 April 1987 di Dewan Besar Markaz Tarbiyyah PAS Pusat, Kuala Lumpur.

Yusof Rawa, “Bertekad Membulatkan Jemaah,” Ucapan Dasar Muktamar Tahunan Ke-34 Partai Islam SeMalaysia (PAS) pada 8 April 1988 di Dewan Besar Markaz Tarbiyyah PAS Pusat, Kuala Lumpur.